



PERDANA LIBRARY
PERDANA LEADERSHIP FOUNDATION
NEWSPAPER CLIPPING

Newspaper	Berita Harian
Date	21/6/2011

Abai sejarah boleh padam bukti

Warisan papir sumbangan Melayu bentuk Pulau Pinang mesti dipulihara

Oleh Faridzwan Abdul Ghafar
faridzwan@bharian.com.my

GEORGETOWN: Persatuan Sejarah Malaysia menyifatkan tindakan mengabaikan bangunan bersejarah dan warisan Melayu-Islam di Pulau Pinang sebagai percubaan untuk memadamkan bukti kewujudan penempatan Melayu di negeri ini sebelum kedatangan Inggeris.

Pengerusinya, Datuk Omar Mohd Hashim, berkata tindakan pihak berwajib mengabaikan warisan Melayu-Islam semakin ketara sejak kepimpinan negeri bertukar tampuk pemerintahan kepada pakatan pembangkang.

"Saya dukacita dengan perkembangan kurang baik berkaitan warisan sejarah Melayu Pulau Pinang sejak akhir-akhir ini dan berharap

kerajaan negeri dapat memainkan peranan lebih baik, selain agensi Kerajaan Pusat.

"Sayang sekali jika warisan yang bernilai ini dibiarkan begitu saja. Ini disebabkan kebanyakan warisan memaparkan sejarah orang Melayu dan sumbangannya terhadap pembentukan Pulau Pinang," katanya dihubungi *Berita Harian*, semalam.

Kelmarin, laporan eksklusif *Berita Minggu* mendedahkan 42 tempat warisan di negeri ini, kebanyakannya kaya dengan sejarah Melayu-Islam tidak mendapat perhatian kerana pihak berwajib lebih menumpukan perhatian di sekitar Tapak Warisan Dunia Pertubuhan Pendidikan, Saintifik dan Kebudayaan Pertubuhan Bangsa-Bangsa Bersatu (UNESCO).

Perkara itu didedahkan penye-

lidik Universiti Sains Malaysia (USM) yang diketuai Dr Saidatulakmal Mohd, hasil maklum balas 238 borang yang diedarkan kepada orang ramai berhubung usaha pemuliharaan peninggalan lama di Pulau Pinang.

Laporan itu turut menyebut, maklum balas mendapati orang ramai mahu pihak berwajib di negeri ini bertanggungjawab memulihara tempat bersejarah yang kaya dengan warisan Melayu-Islam bagi mengelakkannya lenyap, sekali gus menyebabkan kerugian kepada industri pelancongan.

Omar berkata, masalah pengabaian itu sebenarnya sudah berlarutan beberapa tahun dulu dan ia berpunca daripada kurangnya kesedaran masyarakat Melayu Pulau Pinang berhubung kepentingan memulihara warisan sejarah.

"Tak tahu siapa yang harus dipersalahkan berhubung masalah warisan Melayu-Islam Pulau Pinang yang tidak dijaga ini dan sehingga kini persatuan kurang jelas dengan inisiatif untuk membetulkan keadaan ini, sama ada daripada agensi kerajaan negeri atau Pusat," katanya.

Beliau berkata, tinggalan sejarah dan warisan Melayu-Islam mesti dipulihara pihak berwajib bersama-sama komuniti Melayu Pulau Pinang kerana ia adalah bukti kewujudan penempatan Melayu di negeri ini sebelum kedatangan Inggeris.

"Penempatan Melayu sudah ada di Pulau Pinang kira-kira 70 tahun sebelum peristiwa wakil Syarikat Hindia Timur Inggeris, Sir Francis Light bertemu Sultan Kedah pada waktu itu," katanya.

